

Maramataka*

Tau	Te Wā o Matariki
2018	6 - 13 Hūrae
2019	25 Hune - 3 Hūrae
2020	13 - 20 Hūrae
2021	2 - 10 Hūrae
2022	21 - 29 Hune
2023	11 - 17 Hūrae
2024	29 Hune - 6 Hūrae
2025	19 - 25 Hune
2026	8 - 14 Hūrae
2027	27 Hune - 4 Hūrae
2028	15 - 21 Hūrae
2029	4 - 12 Hūrae
2030	23 Hune - 1 Hūrae
2031	11 - 19 Hūrae
2032	30 Hune - 8 Hūrae
2033	20 - 27 Hune
2034	9 - 15 Hūrae
2035	29 Hune - 5 Hūrae
2036	17 - 22 Hūrae
2037	6 - 13 Hūrae
2038	25 Hune - 3 Hūrae
2039	13 - 20 Hūrae
2040	1 - 9 Hūrae
2041	21 - 28 Hūrae
2042	10 - 17 Hūrae
2043	30 Hune - 7 Hūrae
2044	19 - 25 Hune
2045	7 - 14 Hūrae
2046	26 Hune - 4 Hūrae
2047	15 - 22 Hūrae
2048	3 - 11 Hūrae
2049	22 - 30 Hune
2050	11 - 18 Hūrae




Ururangi



Waipuna-ā-rangi

Hiwa-i-te-rangi



Waitā



Waitī



Pōhutukawa



Matariki



Tupuārangi



Tupuānuku

Te Iwa o Matariki

Te Maramataka Māori

E āta mōhio ai ki te aranga o Te Iwa o Matariki, me aro ki te maramataka Māori, me ki, koinei te maramataka tūturu a te Māori e hāngai ana ki te marama, kua ko te maramataka Kerekori e mōhio whānuitia ana. Kei te maramataka Māori, ngā kaupeka tekau mā rua nei, ā, e rua tekau mā iwa me te haurua rā kei ia kaupeka, ka mutu 354 ngā rā kei roto i te tau. Ko te maramataka Kerekori, he maramataka kōmaru, ka mutu 365 kē ngā rā. Nā tērā, 11 ngā rā rerekē nei i waenganui i ēnei maramataka, nā tērā kāore i te pai kia whakamahia ko te maramataka Kerekori hei whakatau i te aranga o Matariki.

Te wā me kitea te aranga o Matariki.

Ko te wā hāngai ki te āta titiro ki a Matariki, ko te wāhanga maramataka nei o Tangaroa, te wā o te whai hua. Ka kitea a Tangaroa i ngā rangi e toru, e whā ranei i mua i a Whiro te ūmatanga o tētehi kaupeka, ka mutu he rerekē te wā ia tau.

Hei kupu whakakapi, kāore i te ōrite te wā e ara ai a Matariki ia tau!

Tēnei Te Iwa o Matariki ka riakina ki runga!
Katoa ngā whetū o te kāhui o Matariki he mana ki tēnā peka, ki tēnā peka o te taiao e ai ki tā te Māori titiro.

Matariki

Matariki tāpuapua. Matariki hunga nui. Matariki ahunga nui. Ka rewa a Matariki, ka maoka te hinu. Ka rewa a Matariki ka rere te kanakana.

Pōhutukawa

Tērā a Pōhutukawa ka mōiri ki runga he pae whakamahara mō aku tau kahurangi kua ngaro. Pīratarata mai rā koutou hei whetū i te pō, kōrekoreko mai rā hoki koutou i te rokiroki o ngā mahara mō ake tonu atu e.

Waitī

Waitī ki runga, Waitī ki raro, e rere nei ō wai hei manapou mō te whenua, hei oranga mō te tāngata, hei kete kai mā te iwi. Kōriporipo tonu nei te ia o te awa, māreparepa ana ngā roto, kōrengarenga te puna a Tāne-te-waiora, he koiora!

Waitā

Tērā te marae nui a Kiwa te kānapanapa nei i raro i a koe Waitā. Hiia mai rā ki runga te tini a Ikaterere, rukuhia ki tai, kohia ki tātahi hei kai mā te tini o uta. Ka hiki mata te tapuwae a Tangaroa! Koia au nui, koia au roa, koia moana tuarangeranga koia moana i āio.

Waipuna-ā-rangi

Haramai te kōnehunehū! Haramai te hāuaua, Haramai te tarahi! Haramai te patapataiāwhā! Takataka mai i te kōmanawa o te hei tapu, whāinūmia e koe e Waipuna-ā-rangi ka tupu te whenua, ka tupu te tangata.

Tupuānuku

Tupuānuku ka pihi nuku, ka pihi rangi, kia makuru haere ake nei. Kia haumako roa hoki te puke ki a Rongo, i āhua mai i tawhiti. Ngā hua o Nukutū ka aohia nuitia, arā rā ngakingaki, ara rā tinaku. Hauhakatia rā te tau, he tau humi e.

Tupuārangi

Ngaruru te waokū, matomato te waokū, māpuapua te puhikaioreore e tau ai ngā tamariki a Tāne, tērā koia te pua nui. Tupuārangi māu e mōmona ai te nehenehe; ka mōmona ngā manu, ka mōmona ngā hua, ka puta ka ora!

Ururangi

E Ururangi whakamāritetia te atua matakerepō koi pūkerikeri mai koi haurokuroku mai, koi huripari mai. Engari kē kia hau kōangi, kia kōtēngitēngi kia purea ai au, kia whakahauoratia ai au.

Hiwa-i-te-rangi

Hiwa nui, Hiwa roa, Hiwa pūkenga, Hiwa wānanga! Hiwaiterangi tēnei te korou o te manawa koronga, tēnei te āwhero o te manako nui. Horahia nuitia mai ngā hua tuawhiti mātinītini o te tau. Purutia e au kia mau te angitū, tāwhia te momoho kia ita! Ka puta ki te whai ao, ki te ao mārama!